

恐龍樂園

[1]大家好，我叫阿魚，今日喺十歲。我之前晚晚都會發一個好真嘅夢，好似真係去咗一個地方，我叫嗰個地方做恐龍樂園，入面有好多唔同嘅恐龍。我第一次去嗰陣仲係得七歲，第一眼係見到隻恐龍蛋。突然，有隻恐龍喺蛋入面走出嚟，我驚到嗆咗一聲！但睇見隻恐龍傻傻望住我個樣，我忍唔住笑咗。

[2]隻恐龍仔咁細隻，我估我BB嗰陣都應該大隻過佢。我同佢講：「不如我叫你恐龍仔啦。」佢好開心。

[3]我又望下四周，原來呢度仲有好多唔同恐龍，有啲識飛，有啲識游水。佢哋唔會打交，仲會好開心噉一齊玩。如果我有架車或者識飛就好喇！噉我就可以再行遠啲，睇多啲。之後我晚晚都會夢到同恐龍仔一齊玩。

[4]一年之後，恐龍仔變咗大恐龍，我估佢仲大過一架車。

[5]我估佢差少少就會大過一架飛機。我以為我同佢會一直開開心心噉玩落去，點知到我九歲嗰年……

[6]我爬咗上恐龍仔個頭，好開心噉同佢講：「恐龍仔，我過埋今日就十歲，大個仔喇！」點知平時成日笑嘅恐龍仔，呢次聽完粒聲都唔出。

[7]恐龍仔諗咗一陣，終於走咗去蘋果樹度，笑住噉拾咗個蘋果畀我。我好開心噉同恐龍仔講：「多謝！我最鍾意食蘋果！」突然，我聽到頭上有把聲講：「阿魚。」我嚇咗一跳，望一望原來係恐龍仔！我仲諗住問佢係幾時學識講嘢，佢就先一步話：「呢次可能係我哋最後一次見喇。」

[8]「吓！點解呀？」我即刻問。佢話：「因為你已經大個仔喇。每個小朋友心入面都有一個樂園，到佢哋十歲就會消失……包括我。好開心喺呢三年識到你，呢三個蘋果就送畀你啦。」「鈴鈴……」鬧鐘響起，我一起身就望到床邊有三個蘋果。自此之後我就冇再見過恐龍仔。如果有人問我嘅好朋友係邊個，我會答：「恐龍仔。」

00021:《恐龍樂園》Dinosaur Paradise

The CC BY 4.0 license REQUIRES that any reused or repurposed content must have the correct ATTRIBUTION. Please use the text below in your citations, printouts and copyright pages.

Attribution Text

“Dinosaur Paradise” (Cantonese), written by Gaaupper, illustrated by Kiu Chon, published by HamBaangLaang (© HamBaangLaang, 2021) under a [CC BY 4.0](#) license on hambaanglaang.hk

[Find out more here: [HamBaangLaang Attribution terms and CC 4.0](#)]
